



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

28 Juin 2019

24 Shawwal 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

LA LOI DIVINE V/S LA LOI DE L'HOMME

Azordi jour dimounes pé donne zot bane idoles plisse l'importance ki la loi de Dieu. C'est la loi des hommes ki pé détruire la vie lor sa la terre là et pé détruire l'enseignement divine et pé mette zot propre la loi avec ene telle force ki celui ki pas montré aucaine l'obéissance de zot la loi ou zot l'instruction, c'est bane sanctions ki zot prend contre sa bane dimounes ki pas pé obéir zot la loi là.

Donc, kan la loi Bondieu pé être remplacé par la loi des hommes, le monde pé paye les conséquences de sa l'égarément là. Azordi kan l'homme fine éloigner avec la loi divine, pé donne plisse l'importance à la loi de l'homme, guetter ki pé arriver dans le monde – dans ene pays – dans ene société – dans ene Jamaat – dans la famille – dans ou l'environnement.

Sa bane ki pé prend zot comme bane connaisseurs pé mette zot propre l'idée et zot la loi pli devant ki la loi de Dieu et bane dimounes ki pé suivre sa bane kalité dimounes là pé alle vers la dérive et zot frayeur pour Dieu fine disparaite et zot crainte (peur) pour zot *Guru* (patron), zot chef fine prend place dans le cœur, sa même ki fine fini la foi dans le cœur de bane dimounes pour Dieu le Tout Puissant.

Zot commence peur l'homme plisse ki zot Créateur. Tout séki zot faire, zot faire seulement pour faire zot *Guru* plaisir, ki li dans zot bane actions, zot travaux – péna nannié pour le plaisir d'Allah. Sa même, kot ou guetter, la paix péna, beaucoup de mals pé faire surface lor la terre. L'heure-là même Allah (swt) So colère manifester pour faire l'homme comprend et prend conscience ki ena ene seul Dieu Unique.

Donc, seul la loi Allah (swt) ki capave arrête sa dégringolade de nous la vie de tous les jours. La loi Allah fine faire so preuve plisse ki 1400 banané de cela et encore pé faire so preuve avec ene Envoyé de Dieu avec le Saint Esprit (*Ruh'il Quddus*) pour ré-amène tous dimounes vers l'unicité de Dieu, lor le droit chemin et faire revivre bane vrais l'enseignements de Dieu.

Tire la crainte de l'homme dans le cœur et remplace sa par la crainte de Dieu. Guette l'effet la loi Allah lor So la terre. Après tout, li si logique ki la terre appartenir à Allah. Allah fine créer dimounes. Allah conne la nature de bane dimounes. Alor ki sanlà mieux placé pour préconise ki la loi bizin servi pour le bien-être de So bane créatures ki Li fine créer ? C'est Allah bien-sûr !

La loi dimounes ena beaucoup manquements, tellement de manquements ki zot casse relation familiale, faire mette boycotte dans bane fonctions familiale et sème la crainte de la loi de l'homme dans le cœur de bane dimounes. Séki zot dire, zot même pas mette en pratique. Zot mette bel pano pour lizié dimounes ki zot ena l'amour pour tous et zot péna la haine pour personne et sa même bane ki montrer zot vrai la haine envers celui ki pas montrer aucaine l'obéissance envers la loi de l'homme, ena la loi ki ena beaucoup de manquements. Bane ki pas ena aucaine respect et l'obéissance et ki pas mette en pratique bane la loi de Dieu, c'est sa bane là ki vine divant divant pour passe zot couma bane grands défenseurs de la vérité et à ce moment là, d'après zot, c'est zot ki ena le droit pou donne le passeport et visa pour paradis, et zot juge la foi de bane les autres.

Par contre, c'est dans la loi divine ki Dieu Le Tout-Puissant fine enseigne nous ki c'est Li (Dieu) ki meilleur juge et dans aucaine la loi de Dieu Li pas fine dire alle juge la foi de bane les autres, mette boycotte, casse relation familiale, pas réponde le *Salaam* (la Salutation en Islam).

Mo raconte zot ene anecdote ki fine passé à Maurice dans ene *Jamaat* (société) ki prétendre ki c'est seulement pou zot ki chemin paradis pou ouvert et zot prend les autres couma bane imbéciles et comme bane ignorants.

Le 02 Février 2019, mo recevoir ene call téléphone le soir ki *Guru* de sa *Jamaat* là fine envoye ene dimoune [à Maurice] pour conne tous problème bane dimounes. Alor fine dire moi – ene capon ki en contacte avec sa dimoune là – ki alor mo capave explique mo problème avec li et mo bizin pas gagne tracas, parski capon pour accompagne moi. Mo fine refuse sa catégoriquement et mo fine dire : « *Demande sa dimoune ki fine vini là, so Guru fine envoye li, dire pour ki raison fine expulser moi de sa Jamaat là ?* » - À cause mo suivre la loi de Dieu, pas la loi dimounes ni *Guru* là ! À cause sa fine expulser moi et mette toutes sortes kalité la loi pour bane les autres dimounes pas gagne contacte avec moi, et moi mo fine écrire Li ene lettre de 12 pages – *Private & Confidential* – daté le 10 Février 2019 avec bane conditions. Si li accepter sa bane conditions ki mo fine mette dans sa lettre là, mo vini et entier *Jamaat* (*Ahmadiyya*) bizin présent sa jour là et tous bizin conne la vérité, *Insha-Allah*.

Li recevoir mo lettre, li batte-pédale (pas de réponse), soi-disant li fine vini pour guette et résoudre bane problèmes ki pé dérouler ici et dimounes fine mette longue longue la queue pour alle explique li zot problèmes. Jusqu'à azordi zéro plombage et mariage dans la famille – propre blood relation – li faire mette boycotte lor moi et mo famille. C'est sa l'enseignement d'Allah et de So Rassool (saws)? Eh ou là, pas vine faire hypocrite ici, totalement hypocrisie ! Pas vine embête sa bane dimounes ki fine croire dans Hazrat Massih Maoud (as) et beaucoup parmi sa bane dimounes là ici fine aveugler, tellement zot croyance lor Khalifa (élu par l'homme) fine dépasse tous limites jusqu'à zot fine arrêter dire, Allah et So Rassool (saws) fine dire sa, fine enseigne sa. [Zot dire] Tout sa, Khalifa ki fine dire sa etc.

Si *Jamaat Ahmadiyya* ti réfléchi sa bien ki en 2015 zot fine célébrer le centenaire (1915-2015) – 100 ans l'existence *Jamaat Ahmadiyya* dans Maurice, ene *Jamaat* ki fine passe par toutes sortes kalité épreuves et cyclones, et sa Khalifa là pas fine même vine guette so *Jamaat* ici. Au lieu de sa, li fine préfère alle dans ene l'autre pays pendant sa même l'intervalle là, mais li pas vine mette so lipié ici.

Ici, Jamaat Ahmadiyya ti faire bel préparation ; bel bel pano fine metter à travers l'île, et fine même vine mette pano dans paraze Petit-Raffray, et ene sel coup, pano fine fizette ! – Zot Khalifa fine change l'idée, népli pou vini ! Commié l'argent Chanda, bane contributions ki beaucoup fine faire pour accueil zot *Guru* fine alle dans vide ! Li pas vini li. Au lieu de sa, li dire zot alle dresse zot Jamaat ! Bé li comme ene Khalifa ki sa bane dimounes là fine élu, ki so rôle comme ene papa spirituel ? Li ti bizin saizi de sa l'occasion là et vine dresse Jamaat là !

Voilà ki arriver kan ou quitte Allah, Allah So l'enseignements et l'enseignement de nous bien-aimé prophète Hazrat Muhammad (saws) ! Ou alle mette tout ou croyance dans ene « *Elect of man* ». Guette ki kalité manquements ena. Kan péna « *divine guidance* », guette ki kalité gaffe ou faire ziska ou piétine l'enseignement d'Allah et So Rassool. Ou manifester couma Ibliss avec tout l'arrogance, pas paye salaire ki ene dimoune fine travail et même so temps service ki li fine passer dans so travail, et ou présente Khalifa couma ene bolom loulou pour faire bane dimounes faibles peur, créer bane zaffaires négatif dans la tête de sa bane dimounes là, dire pas fréquente zot, pas invite zot, mette boycotte lor zot dans tous ou bane fonctions et même fonction familiale. Zot rentre dans la vie privée de sak famille, sa bane ki à la tête du Jamaat ici là, zot bane grands défenseurs Khalifa zot, zot mette la loi avec les autres dimounes, bane ti dimounes couma nous dire, ti famille, mais zot, zot faire séki zot envie. Voilà kot Jamaat Ahmadiyya national et international pé aller. Zot pé faire la loi d'Allah vine en poussière et zot pousse zot la loi devant comme ene bêton.

Par sa façon de faire là, Allah même pé amène zot vers zot décadence petit à petit, sans ki zot réfléchi. Et mo capave dire ou ki beaucoup à travers le monde fine quitte le Jamaat Ahmadiyya par façon ki sa pé fonctionner ; kot c'est bane dimounes ki péna *Taqwa*, ki ena family-feeling, ki supporte l'idée de dynastie, c'est zot ki pé dirige sa Jamaat là, zot pé rode contrôle partout. Li bien malheureux. Sa ti supposé ene Jamaat ki bazé lor l'enseignement du Quran et de Nabi Kareem (saws). Nous obéir séki Allah et So Rassool (saws) fine dire nous faire. Mais malheureusement c'est le contraire ki pé passer.

Pareil couma mo fine dire ou au commencement mo Khutba, zot *Guru* fine envoye ene so représentant à Maurice pou guetter ki problème ki ena à Maurice. Affolé, zot pé guetter ki problème bane dimounes là ena, et moi mo dire zot ki Khalifa là fine bien tracasser par le progrès du Jamaat Ul Sahih Al Islam à travers le

monde, surtout récemment en Inde. So bane Amirs et missionnaires dans l'Inde pé donne li tout feedback et aussi dans bane les autres pays encore. Alor panique ! Li fine envie rassure li ki personne à Maurice aussi pas pé virer et toute suite li envoie so représentant pour rassure bane là ki li pou régler zot bane problèmes. Li fine envie conner ki pé passer coumsa à Maurice... après plisse ki quinze ans ! Alor, sanlà vini, li servi ene stratégie, vine explique li ki problème ou ena, couma dire sa bane politiciens là. Tout sa c'est panique dans zot camp couma Allah dire dans Quran Shariff et au commencement Manifestation Divine, Allah ti révèle moi sa verset là : « **Fatarallaziina fii quluu bihim-marazuuyy-yusaari-'uuna fiihim yaquu-luuna nakhshaaa 'an-tusii-banaa daaa-'irah. Fa-'asal-laahu 'ayya'-tiya bil-fathi 'aw 'amrim-min 'indihii fayus-bihuu 'alaa maaa 'asarruu fiii 'anfusihiim naadimiin.** » – *To trouver couma bane ki ena ene maladie dans zot le cœur, dépêcher pour alle parmi sa bane là et zot dire : 'Nous peur, attention ene changement dans nous condition arriver'. C'est possible ki Allah envoie toi la victoire ou autre chose ki faire Li plaisir, et alor zot pou chagrin pou séki zot fine cassiette dans zot le cœur.* (Al-Maida 5 : 53).

Voilà, sa ki zot fine gagne peur ki attention la situation changer ici aussi, sa pour faire zot chagrin séki bane plans ki zot ti cassiette dans zot le cœur. Zot montrer ki soi-disant zot fort, pas pé prend nous compte, mais bel plans pé faire sous tapis pour arrête le progrès du Jamaat Ul Sahih Al Islam. Là-haut zot pé montrer zot pieux envers bane dimounes, mais zot pas pour capave cassiette séki ena dans zot le cœur avec Allah. Après zot parle de l'obéissance envers zot et kan to cause ki kalité fané zot pé fané, zot dire « *To rebel* ». Soi-disant zot croire dans révélation divine, mais kan Allah (swt) révèle sa humble serviteur là, zot dire « *so-called revelation* » et envoie *laanat* (malédiction) et dire ki pé créer désordre dans Jamaat, bizin expulser, mette dehors.

Bane ki faire beaucoup zéffort pour mette en pratique l'enseignement divine, obéir Allah et So prophète, lutter pour la cause Allah, sa bane là infréquentable, mais bane ki rejette la loi d'Allah, fine rejette zot la foi aussi pour le *Tawheed* (l'unicité d'Allah), sa bane là pé la guerre pour zot idoles. Eski sa bane là ena ti la grain la moutarde de *Taqwa* dans zot le cœur ? Couma Allah dire dans Quran Shariff : « **Afalaa yatadabba-ruunal Quran ?** » – *Eski zot réfléchi lor Quran ?* (An-Nisa 4 : 83).

Lor séki Allah fine faire dessane pour vine ene vrai croyant, zot pas donne sa l'importance. Seulement Allah (swt) conne bien séki ena dans zot le cœur. Allah (swt) dire dans Quran : « **Wa maa arsalnaa mir-Rasuulin illaa liyutaa-a bi-iznillah.** » – *Nous fine envoye ene Messenger pour ki dimounes obéir Li, par la grâce d'Allah.* (An-Nisa 4 : 65).

Donc, c'est ene grâce d'Allah même kot Allah même envoye So Messenger pour guide dimounes vers Allah et mette zot lor le droit chemin et faire zot gagne la crainte d'Allah, l'amour d'Allah, confiance lor Allah et zot récompense pour vine seulement de côté d'Allah. Et donc, kan sa fine cultiver dans zot le cœur, sa bane dimounes là pour vine bane *Dai-Ilallah* (invite dimounes vers ene seul Dieu) et c'est la loi d'Allah ki pou passe avant tout pou zot ; zot pou préfère la vie après la mort, au lieu la vie lor la terre, faire la guerre pour cause Allah. Celui ki faire la guerre pou cause Allah soit ki li trouve la mort ou li sorti victorieux, so récompense pour vine seulement de côté d'Allah et péna doute là-dans, li pour gagne ene grand récompense (*ajran azimaa*).

Donc, sakaine parmi nous bizin juge nous la foi avant ki nous juge la foi de bane les autres. Seul Allah (swt) ki conner ki sanlà pur. Pas vine arrogant et prétendre ki ou pli pur ki les autres. Lire le Quran, comprend Celui ki fine créer ou, fine envoye ou lor sa la terre là, ki ou la vie, ou la mort, ou manger, boire, ou l'honneur etc., trouve avec Li et Li-même (Allah) dire : « **Alam tara ilallaziina yuzakkuuna anfusahum? Balil-laahu yuzakkii may-yashaaa-u wa laa yuzlamuuna fatiilaa.** » – *Eski to fine considère cas bane dimounes ki dire zot-même pur ? Mais c'est Allah ki rende pur bane ki Li oulé. Et Li pas faire personne le plus petit injustice.* (An-Nisa 4 : 50).

Donc, couma ou capave comprend dans sa verset Quran là ki Allah (swt) dans So bane paroles, So bane la loi, péna aucaine manquement. Li récompense ou bane kitchoses de bien ki ou faire, couma Li puni aussi bane kitchoses de mal ki ou faire. Allah (swt) pas faire aucaine injustice, même grosseur ene ti fourmi, mais le plus petit du bien ki ou faire, au contraire Li multiplier li, et Li accorde ou par Li-même ene grand récompense.

Donc, bane ki pé pratique l'erreur, pé commette beaucoup erreurs et zot mette zot propre la loi sans respecter la loi de Dieu, zot désire séki ou aussi prend le chemin ki zot fine prend – chemin l'erreur, tombe dans bassesses couma zot-

même, et faire ou peur zot plisse ki ou ti bizin peur ou Créateur, Celui vers Qui ene jour ou pour retourner et avec ki ou pou bizin rende compte de séki ou fine faire lor sa la terre là.

Si ou évite bane choses les plus importants ki Allah (swt) fine empêche ou faire, pense so conséquence plus devant. Allah (swt) oulé rende tout kitchose clair pou ou – Li montrer ou la façon couma pou vive parmi dimounes et parmi ou familles – honnête, humble, respectable, prêche la paix, pas ena la haine, aide ou prochain, pas mette boycotte, vivre en l’harmonie, avec fraternité. Au contraire, Allah (swt) fine montrer nous, kan deux groupes croyants faire la guerre entre zot, essaye faire la paix parmi zot, et Allah (swt) content bane ki faire l’égalité. Allah (swt) dans Quran même faire nous bien comprend lor là, kot Allah dire bane croyants : **Zot, bane croyants, zot vraiment bane frères. Alor faire la paix entre ou deux frères et craindre Allah, pour ki ou gagne So miséricorde.**

Comprend sa bane paroles d’Allah là bien, Celui ki fine créer ou, ki pena aucaine manquement dans So bane paroles – Kot ena la haine, mette boycotte, casse relation familiale, pas réponde *Salaam*, ni faire *Salaam* etc. dans So bane paroles ? Au contraire tous sa bane mauvais actions là c’est pratique de Shaytane. C’est Shaytane ki encourage tout sa. Shaytane li ene l’ennemi d’Allah et de tous So bane vrais croyants. Bane ki suive pas de Shaytane zot pas ena vrai la foi dans Allah et So Rassool. Tous sa bane mauvais pratiques là c’est pas bane pratiques de bane ki ena la foi dans Allah et So Rassool ; zot pas pratique d’ene vrai croyant.

Donc, si ou pé prétendre ki ou sa Jamaat [de vérité] là et ou ena ene chef spirituel à la tête ki pour amène dimounes vers l’Islam et le chemin vers paradis, eski c’est sa kalité mentalité ki zot pé adopter pour amène dimounes vers sa religion ki Allah (swt) fine parfaire là, kot ena la haine et l’ennementé envers les autres ? Eski c’est sa l’enseignement ki zot pé montrer ? Zot même fine amène combat lor combat, débat lor débat lor la continuation de la révélation divine et ki la porte de la venue de bane prophètes (*prophethood*) pas fermer. Dans sa siècle là, couma Allah (swt) élève sa humble serviteur là, alor pour protège zot Khalifa « *elected by man* », zot dire : *Impossible, les autres pas capave gagne révélation et ene l’autre pas capave vine Khalifa !*

Zot trouve sa impossible et ferme la porte révélation et « *prophethood* » par zot-même et tombe dans ene bassesse si bas kot l’histoire se répète à chaque fois ki

ene Messenger vine de côté d'Allah, zot traite li toute sorte kalité noms, traite li de menteur, fou, traite so révélation ki vine de côté d'Allah ene « *so-called revelation* ». Même alle pli bas kot zot dire bane dimounes ki envie écoute sa Messenger ki vine de côté d'Allah là, zot dire sa bane là : *Ou pé seulement suivre ene dimoune ensorcelé, etc.*

Donc kan ou trouve sa kalité kitchose ki arriver avec l'arrivée d'ene Messenger d'Allah, sa prouve la véracité de sa Messenger là. Kan ou lire Quran Shareef, ou pou trouver ki tous bane Messagers ki fine vine de la part d'Allah, zot fine gagne même traitement. Péna aucaine Messenger d'Allah ki fine vini fine marche lor tapis velours – en d'autres mots, zot pas fine gagne tout facile kan Allah fine nomme zot prophète. Et tous dimounes ene sel coup pas fine croire dans zot message. Tous les temps zot fine passe par bane grands épreuves, même avec zot propre familles et seulement ene ti groupe dimounes ti accepter zot et zot gagne persécution zot aussi. Zot passe par toute sorte kalité épreuve et tous les temps bane dimounes pauvres même, bane ti dimounes ki gagne sa grâce là pour croire dans ene Messenger d'Allah, arrive séki arrive.

Mais ena aussi ki accepter le Messenger d'Allah, mais avec persécution et épreuves ki zot passer, kan pé mette boycotte lor zot, zot pas capave tini, zot quitte la Manifestation Divine, zot casse zot *Bai'at*.

Ena aussi vini comme bane hypocrites, seulement pour créer désordre, vini pour invente toute sortes kalité mensonges et kan zot quitte la Manifestation Divine, zot dire toute sorte kalité mensonge ki même zot arriver dire tous sa là c'est zistoire vié dimounes, et zot dire ki Messenger là li copier dans bane livres et dire ki sa révélation. *Nawzobillah min Zaalik !*

Mo pou bizin arrête là-même azordi, sinon le Khutba Jummah pour alle trop longue et li ti pou très bien pour faire les autres conner ki lettre mo ti adresse celui ki ti vini pour écoute problèmes de bane dimounes du Jamaat Ahmadiyya et li fine aller li aussi. Bane ki fine explique problèmes jusqu'à azordi péna aucaine réponse, aucaine action.

Donc, dans le Khutba Jummah mo pas pou capave lire sa lettre là, mais li pou attacher [en anglais] avec le Khutba Jummah lor website ensam, *Insha-Allah*.

Pour terminer, comme le Khalifatullah, mo conseil pour zot, tous bane ki fine cause contre la loi Allah, soit par l'ignorance ou avec connaissance, bizin obligatoirement faire *Tawbah*. La loi Allah li pas pour ene l'époque seulement. Li pour jusqu'à la fin du monde. Nous péna droit apporte aucaine modifications dans la loi d'Allah et ni nous critique la loi Allah. Attention par l'ignorance nous alle dire kitchose ki capave faire nous perdi la foi. Nous bizin pèze nous mots bien kan nous cause concernant la loi Allah et contrôle nous plume aussi avant nous écrire.

Nous vive dans ene pays non-islamique, nous respecter la loi pays-là mais sans pour autant renier ou critique la loi d'Allah. Na pas dénigrer la loi d'Allah pour faire l'homme content, pas donne ou *Guru* plisse l'importance ki Allah et So Rassool (saws). Si ou pas conne ene kitchose, vaut mieux garde le silence. Reste tranquille, pas alle ajoute ou boute, attention ou alle contre la loi divine et sa pour fatale pour ou et kot la punition divine pas pour tarder pou vine lor ou et alor sa pour vine bien grave.

Mo faire *duah* ki Allah aide zot pour comprend sa Khutba là en profondeur. *Ameen*.

*** **

Lettre à Mukarram Nasser Shahid Sahib (Copie à Hazrat Mirza Masroor Ahmad – KMV * AMC) – En Anglais:

http://jamaat-ul-sahih-al-islam.com/jusai2019/hmaa_let_amc_10feb19.pdf